



Neska-mutiko talde bat, lehen jaunartzea egin berritan.

ARTXIBOKOA

Lehen jaunartzetako gehikeriak gogor salatu ditu Sebastianek

«Barregarria da gertakari erlijiosoa festa bihurtu nahi izana»

Azken urte hauetan neska-mutikoen lehen jaunartze egunean antolatzen diren ospakizunek hartu duten jitea ikusita, jarrera hori erotik aldatzeko deia egin die Fernando Sebastian Iruñeko atzapezpikuak Nafarroako familiei eta parrokiei. Sebastianen ustez, «barregarria da gertakari erlijioso hori gizarte festa bat bihurtu nahi izatea».

Efe / Iruñea

LEHEN JAUNARTZEEN inguruan antolatzen diren ospakizun handiak gogor kritikatu ditu Sebastianek aste honetan bertan zabaldu duen idatzi pastorallean. Lehen jaunartzeak izeneko idatziak, gertakari horren inguruan egiten diren bidegabekeriak salatu ditu, eta horiek guztiek sakramentuaren benetako zentzua galduarazi egiten dutela azpimarratu. Sebastianen iritziz, behar-beharrezkoa da egoera hori aldaraziko duen «erreakzio irmoa».

Idatzi pastorallean Iruñeko atzapezpikuak azpimarratzen du «ondo dagoela» lehen jaunartzea famili giroan edo komunitatean ospatzea, baina gertakari horren inguruan antolatzen diren jai

handien «gastua eta luxua» onartezina dela guztiz. «Gehikeria izugarriak eta barregarriak egitera heltzen dira», zehaztu du Sebastianek. «Sobran daude», iritzi dio, «bazkari handiak, bideoak eta diru xahutze guztiak».

Iruñeko atzapezpikuaren arabera, txorakeria horiek guztiak «nahastu egiten dituzte haurrak», eta, «euren lehen jaunartzearen egia sakona intentsitatez bizitzea» eragozten die nabarmen. Sebastianek azpimarratu duenez, jaunartzeak duen esanahi erlijiosoa ulertarazteko aldatzea erabatekoa behar da, eta aldakera hori egitea «gurasoei, ikastetxei eta parrokiei» dago-kie. «Haien ardura da», zehaztu du, «haurrek sakramentu hori pozik eta benetako erlijiosotasunez bizitzea».

Idazki pastoralak dio jaunartze festaren ingurukoak prestatzen «interes handia» jartzen dela, baina egun hori igarotakoan jaunartzeak duen esanahiari buruzko guztiak ahaztu egiten direla. Ildo horretan galdetzen du ea nork erakusten dien haurrei «intimitatean otoitz egiten» eta ea nork laguntzen dien festaren ondoren jaunartzera.

Hori guztia dela eta, karta pastorallean Sebastianek ohartarazten du haurrak behar bezala hezteak duen garrantzia. Horretarako «ondo egindako katekesia» eskaini behar zaizela dio, «euren erara kristauak izateko egia zein den erakutsiko dien» katekesia hain zuzen ere. Hala ere, Iruñeko atzapezpikuak gogoratu du gurasoak direla «katekesiaren jarraipena» egin behar dutenak. x

Osasun plangintza integrala garatu nahi du Sodepazek sahararren kanpamentu batean

■ Xedea da hango ospitaleko azpiegitura hobetzea eta profesionalak trebatzea

Juan Kruz Lakasta / Iruñea

ALJERIAKO saharar errefuxiatuen lau kanpamentuetako batean (Naiun) osasun plangintza integrala garatu nahi du Sodepaz-ek, Nafarroako gobernuaz kanpoko erakundeak. Javier Eskubi proiektua lantzen ari den mediku taldeko koordinatzaileak azaldu duenez, «helburua da basamortuan Naiungo kanpamentuan bizi diren 40.000 lagunei oinarritzko osasun zerbitzuak bermatzea». Naiunen ospitala bat

martxan dago jada, baina oso modu txarrean. Nafarroako medikuen zeregina izanen da ospitaleari beharrezko azpiegitura ematea, eta han lan egiten duten osasun arloko profesionalekin formakuntza lana egitea.

Sodepazek gauzatu nahi duen proiektua hiru urteko plangintza da, eta aurrera atera ahal izateko urtero 50 bat milioi pezeta behar dira (bi milioi libera inguru). Sodepazeko Tere Arostegiren arabera, «ezinbestekoa izanen da Nafarroako Gobernuaren lagun-

tza». Foru gobernuaren dirulaguntza oraindik bermatzeke badago ere, beren poltsikotik dirua jarriz osasun arloko 20 profesional nafar Naingo kanpamentuan izan ziren apirilaren 19tik 23ra. Errefuxiatuen egoera latza dela kausa, trebakuntza lana ezezik, lan praktikoa ere egin behar izan zuten: hamabost egunotan 626 kontsulta egin zituzten. Eskubi Añuinen izana da, eta, hark dioenez, desnutrizioa eta ur txarra edateak eragiten duen behar akosa dira arazorik larrienak. x

laburrean

■ A-15eko irteeran 1995ean istripu bat eragin zuen kamioi gidaria kondenatu egin dute

NAFARROAKO autobiako Andoaingo irteeran kontrola galdu eta familia bateko lau kide hil zituen kamioiko gidariari zauriak eta heriotza eragin zituen zuhurtzigabetasuna leporatu dio epaileak. Haren arabera, gidariak ez zituen errespetatu abiadura moteltzeko seinaleak, eta, kamioia kontrolatzeko gai ez zela ikusi zuenean, ez zen horrelakoetarako bereziki prestatuak dauden hondar guneetan sartu. Hori zela eta, 41 milioiko kalteordaina (1.640 libera inguru) eman beharko dio hildakoen familiari. Horrezaz gainera, ehun mila pezeta ordaindu beharko ditu isun moduan, eta gidatzeko baimena kendu egingo diote urtebeterako. Istripua A-15 autobidea zabaldu eta hilabete gutxira gertatu zen, 1995eko abuztuan. Nafarroako autobiako irteeran, Andoaingo parean, kamioiak kontrola galdu zuen eta N-1 errepidetik zihoan auto bat arrastaka eraman zuen. Auto hartan zihoazen lau lagunak kiskalita hil ziren barruan. x

■ EHuko klaustraok Gobernu Batzarra aukeratuko du gaur

EUSKAL HERRIKO UNIBERTSITATEKO (EHU) klaustraok Gobernu Batzarreko kideak hautatuko ditu, honako kolektiboak ordezkatzuz: dekanok eta zentro zuzendariak, sailetako zuzendariak, irakasleak, ikasleak, AZPak eta institutu unibertsitarioak. Klaustra gaur goizeko 10:00etan hasiko da, Bilboko Enpresa eta Ekonomia Zientzietako Fakultatean egingo da. Horretaz gain, Pello Salaburu EHuko errektoreak gestio txostena azalduko du. Bestalde, aurreko klaustraon egin bazen ere, gaurko saioan berriz bozkatuko da euskal preso politikoak hurbiltzeko eskatzen duen mozioa. Azkenik, Francisco Aldekoa eta Fernando Rodriguez Unibertsitateko Irakasle Batzordeko kide gisa berresten dituen edo ez erabakiko du. x

■ Gaur hasiko dira Bilbon Elkarri-k eta Ikastolen Elkarteak antolatutako jardunaldiak

GAUR hasi eta larunbatera bitartean, heziketari buruzko IV. Jardunaldi Pedagogikoak egingo dira Ercilla hotelean, Ikastolen Elkarteak eta Elkarri-k antolatuta. Bilkuraren helburu nagusiak hauek dira: alde batetik, bakegintzarako hezkuntzaren dimentsioa eta ikusmolde ugari buruzko informazioa, gogoetarako eta eztabaidarako markoa eskaintzea; eta, bestetik, haur hezkuntzarako, lehen hezkuntzarako eta bigarrenetarako bake heziketari lotutako proposamen didaktikoak aurkeztea. Antolatzaileek azpimarratu dutenez, jardunaldiak arazoak «modu onuragarrian konpontzeko jarrera» duen ororentzat eta «talde kulturala sortzeko eskolak izan dezakeen garrantzia» interesa dutenentzat dago zabalik. Bilkura Jonan Fernandez Elkarri-ko koordinatzaileak eta Antonio Campos Ikastolen Elkartearen lehendakariak zabalduko dute. x

■ Egizan-en kontrako salaketa aurkeztu dute Betiko Alardearen Aldekoek

BETIKO ALARDEAREN ALDEKOAK taldeko kideek Egizan-en kontrako salaketa aurkeztu zuten herenegun Ertzaintzarenean, talde feministak sinatuta Tolosan agertu diren afixak direla eta. Emakumeak eskopetero moduan desfilatzearen kontra dauden zentzibait argazki erakusten dira karteletan, haien artean Irun eta Hondarribiko zenbait buruzagi politiko eta alardeko agintariren bat edo beste. Bidasoaldeko Emakumeak elkarteak, berriz, ekimen horrekin zerikusirik batere ez duela argitu nahi izan du, kartel horiek «mesede baino gehiago kalte egiten» dietela argudiatuta. Emakumearen partehartze berdinazalea aldarrikatzen duen elkarte horrek azpimarratu du euren ekimen guztiak Bidasoaldeko Emakumeak izenarekin izenpetzen dituztela. x

JAGOBA MANTEROLA



Azkenekoan irakasleak izan dira bisitan

Irale programan euskalduntzen ari den maisu-maistra talde batek bisitatu zuen herenegun EGUNKARIAK Andoaingo duen erredakzio nagusia. Egunkariako barrenak neska-mutiko bihurriei erakusten daude ohituta hemengo gidariak, eta eskertu zuten azalpenak serio entzun zituen horrelako talde jator bat hartzea. x